

---

## 顏氏家廟碑文

《唐故通議大夫行薛王友柱國贈秘书少監國子祭酒太子少保顏君碑銘并序》。

君諱惟貞，字叔堅。其先出於顓頊之孫祝融，融孫安為曹姓。其裔邾武公，名夷甫，字顏。子友，別封鄖，為小邾子，遂以顏為氏。多仕魯，為卿大夫。孔門達者七十二人，顏氏有八。戰國有率、燭，秦有芝、貞，漢有異、肆、安樂。其後喪亂，譜牒淪亡。魏有斐、盛，字叔臺，青、徐二州刺史、關內侯，始自魯居於琅琊臨沂孝悌里。生廣陵太守、給事中、葛繹貞子諱欽，字公若，精《韓詩》、《禮》、《易》、《尚書》，學者宗之。生汝陰太守、護軍、襲葛繹子諱默，字靜伯。生晉侍中、右光祿大夫、西平靖侯諱含，字弘都。隨元帝過江，已下七葉，葬在上元幕府山西。生侍中、光祿勳、西平定侯諱髦，字君道，事具《孝行傳》。生州西曹騎都尉、西平侯諱綸，字文和。生宣城太守、御史中丞諱靖之，字茂宗。生己陵太守、度支校尉諱騰之，字弘道，善草隸書，有風格。梁武帝《草書評》云：“顏騰之、賀道力並便尺牘，少行於代。”生輔國江夏王參軍諱炳之，字叔豹，以能書稱。生齊持書御史兼中丞諱見遠，字見遠。和帝被弑，一慟而絕，梁武深恨之，事見《梁》、《周》、《北齊書》。生梁鎮西記室參軍諱協，字子和，感家門事，義不求聞達，元帝著《懷舊詩》以傷之。撰《晉仙傳》五篇、《日月災異圖》兩卷，文集廿卷，見《梁書》。生北齊給事、黃門侍郎、待詔文林館、平原太守、隋東宮學士諱之推，字介，著《家訓》廿篇、《冤魂志》三卷、《證俗字音》五卷，文集卅卷，事具本傳。黃門兄之儀，周御正、御史、中大夫、麟趾學士。隋文輔政，不署矯詔，索重又拒之，出為集州刺史、新野公。後朝朔望，引之御榻曰：“見危授命，臨大節而不可奪，古人所重，何以加卿？”事具《周書》。弟之善，隋葉令，子孫見于後。

黃門生皇泰王記室諱思魯、愍楚、遊秦。小記室字孔歸，君之曾祖也。隋司經校書、東宮學士，率子弟奉迎義旗於長春宮，招瓜州，拜儀同。博學善屬文，自為父集序。《國史》稱溫大雅在隋，與思魯同事東宮，彥博與愍楚同直內史省，彥將與遊秦同典校秘閣。二家兄弟，各為一時人物之選。少時學業，顏氏為優，其後職位，溫氏為盛。《溫氏譜》亦載焉。生勤禮，字敬，君之祖也。幼而朗悟，識量弘遠，工於篆籀(zhòu)，尤精詁訓。解褐校書郎，與兩兄弟師古、相時同時為弘文崇賢學士，弟育德又於司經校定經史，當代榮之。太宗嘗令師古贊崇賢學士，以兄弟，特命蕭鈞贊之曰：“依仁服義，懷文守一。履道自居，下帷終日。

業彰素里，行成蘭室。鶴鑰馳稱，龍樓委質。”著作郎，修國史，夔府長史，贈虢州刺史。生昭甫，本名顯甫、敬仲、殆庶、無恤、少連、務滋、辟強。昭甫字周卿，君之父也。幼而穎悟，尤明詁訓，工篆籀草隸書，與內弟殷仲容齊名，而勁利過之，特為伯父師古所賞重，每有註述，必令參定。嘗得古鼎廿餘字，舉朝莫識，盡能讀之。高宗侍讀、曹王屬，贈華州刺史。真卿表謝，肅宗批答：“卿之乃祖，當為碩儒，既高倚相之能，遂有臧孫之後。不墜其業，在卿之門。”生我伯父諱元孫？墓(jì)君。伯父聰穎絕倫，尤工文翰。舉進士，考功郎劉奇特標榜之，由是名動海內。累遷太子舍人。玄宗監國，專掌令畫。嘗和《遊苑詩》，批云：“孔門稱哲，宋室聞賢。翰墨云捷，莫之與先。”曆滁、沂、豪三州刺史，贈秘書監。君仁孝友悌，少孤，育舅殷仲容氏，蒙教筆法。家貧無紙筆，與兄以黃土掃壁，本石畫而習之，故特以草隸擅名。天授元年，糊名考試，判入高等。以親累授衢州參軍，與盈川令楊炯、信安尉桓彥範相得甚歡。又選授洛州溫縣、永昌二尉，每選皆判入高科。侍郎蘇味道以所試示介眾曰：“選人中乃有如此書判！”嗟歎久之。遂代兄為長安尉、太子文學，以清白五為訪察使，魏奉古等所薦。五邸初開，盛選寮屬，拜薛王友柱國。伯姊御史大夫張知泰妻魯郡夫人亡，將葬，數家占君不宜臨壙。君哭而拒之曰：“豈有忘手足之痛，牽拘忌而忍自絕乎？”弗從。其年秋七月才生明，遘疾而歿，教義者隱而傷焉。與會稽賀知章、陳郡殷踐猷、吳郡陸象先、上谷寇泚、河南源光裕、博陵崔璩友善，事具陸據所撰《神道碑》。累贈秘書少監、國子祭酒、太子少保。真卿表謝，肅宗批答云：“卿之先人，德行優著，學精百氏，藝絕六書。頻擢甲科，屢升循政，曳裾王府，名右鄒枚。載筆春宮，道高徐阮。既而壽乖華髮，器紓青雲，業載史臣，慶傳令子。追存盛美，褒贈崇班，且旌善於義方，俾揚名於有後。”

亳州生春卿、果卿、曜卿、旭卿、茂曾。春卿工詞翰，倜儻有吏才，蘇頌舉茂才，偃師丞。果卿文理清峻，所居有聲，太常丞、攝常山太守。祿山反，捨其心手，開土門，拜衛尉卿兼中丞。城陷，果卿叱詈之，遂被鉤舌支解而終，贈太子太保，謚曰忠節。真卿表謝，肅宗批答云：“自羯胡猖狂，入我河縣，所在官吏，多受迫脅。卿兄以人臣大節，獨制橫流，或誣其謀主，或斬其元惡。當以赦兵懸絕，身陷賊廷，旁若無人，歷數其罪。手足寄於鋒刃，忠義形於顏色。古所未有，朕甚嘉之。”曜卿工詩書草隸，十五以文學直崇文館，淄川司馬。旭卿善草書，胤山令。茂曾好屬文詁訓，仁厚絕眾，犍為司馬。君生闕疑、允南、喬卿、真長、幼輿、真卿、允臧。闕疑仁孝有吏能，精《詩傳》，善剖判，杭州參軍。

---

允南，仁孝有清識，工詩，人多誦其佳句，善草隸，與春卿、杲卿、曜卿同日於銓庭為侍郎席建侯所賞，達奚珣薦為左補闕。真卿時為殿中，正至三拱法座，舞蹈而衣袂相接者三。故允南賦詩云：“誰言百人會，兄弟也霑陪。”歷殿中、膳部、司封郎中、司業、金鄉男。喬卿，仁和有吏幹，富平尉。真長，清直，早世。幼輿，方雅有醞藉，通班《漢》，左清道率府兵曹。真卿，早孤，蒙伯父？鼎(jǐ)允南親自教誨。舉進士，歷校書，制舉醴泉尉，陟清白，長安尉。三院御史，四為大夫，六為尚書，再為採訪節度，充禮儀使，光祿大夫，魯郡公。允臧，敦實孝悌，有吏能，制舉延昌令，監察，充朔方衣資使、殿中，三為侍御史，中允、江陵少尹，荊南行軍。

豪州及君孫：泉州，佐父開土門，彭州司馬。威明，邛州司馬。季明、子幹、沛、翊、頤、誕，及外孫博野尉沈盈、盧逖，並為逆胡所害，各蒙贈五品京官。濬，好屬文。翹、華、正、？(岳頁)、慈明，都水使者。頴，好五言，校書。頤，仁孝方正，明經，大理司直，嶺南營田判官，執喪九日不食。頡，河陽尉。顥，鳳翔參軍。頽，工小楷，洗馬。頗，恭仁，奉禮郎，並早喪逝。絃，方義，主簿。鼎觀，並沒蠻。襲明、微明、德明，未仕。通明，獲嘉尉。將明，昌明尉。克明，崇文，明經，衛密標榜之。翫，有德行文詞，華原主簿。準，溧水尉。覲，頗工文，襄陽尉。覲，有文行，弘文進士。顥，仁友清白，常熟令，封金鄉男。顥，清介勤學，侍郎蔣冽賞其判，京兆兵曹，襲金鄉男。頤，仁純，常熟主簿、任城男。頤，浚儀尉。頌，清源尉。頂，幹辦，揚府法曹。願，長厚清白，朝邑尉。顥，左率倉曹。碩，秘書正字。顥，有吏幹，欽州錄事參軍、曲阜男。？(弁頁)，好為詩，富陽尉。顥，好為文，常州參軍，並粗有所立。君之諸祖父群從揚庭、頤，並侍讀。強學、益期，並學士。中和、至誠、敬仲、大智、溫之、激之、澹之、瑨、挺、援、撰、溫、泳、陵，並明經。康成、強學、希莊、日損、隱朝、鄰幾、知微、舒、說、順、勝、式宣、韶，並進士、制舉。有意、中和、趨庭、希莊，至刺史。利仁，明天文。欣期、元淑、景靈，並校書。光庭，注《後漢書》。嘉賓、千里、昇庠、匡朝、怡、滔、渾、允濟、措、逸、覲、不器、防，有文詞。博古、少連、恭敏、惇學行。敬仲、溫之，以孝聞。潤，有風義。晃、鑄、邈、迢，以清白稱。其餘咸著官族，不獲悉數。

建中元年，歲次庚申，秋七月癸亥朔鐫畢，八月己未真卿蒙恩遷太子少師。冬十月壬子男顥封沂水縣男，碩新泰縣男，侄男頂丞縣男，頌費縣男，頤鄆縣男，徵軀官階勳爵，並至二品，子姪八人受封，無功無能，叨竊至此，子孫敬之哉。